



懷舫詩集卷之四

送歌者歸白下

漏斷香銷酒乍醒迢迢幽恨結津亭
昨宵深語寒燈燼前路春思芳草青
江上樓臺雙舞袖天涯情緒一浮萍
座中誰唱楊枝曲客耳驪歌久厭聽

古意

大風吹雲起影落野塘前郎今渡河去
妾家春水邊郎如橋下水妾似河邊柳
春水去悠悠春色那能久妾意比春長
春來郎已遠芳樹繞千重幽夢何方遣
春草滿江亭春波映草綠郎行有日返
可似春歸速

暮雪宿桐城村

淮濱早濕足輕陰馬首寒風落細塵將卸山梅尤惹恨
未開江杏已遲春暮烟覆水雲遙暝空壁搖燈漏正沈
獨臥荒邨懷雨雪今宵知有斷魂人

雪行盱山歸途宿圻橋村舍

升輿望積雪浩淼迷蹊路四野人跡滅緣溪覓津渡喜
茲萬頃玉照我寸衷素京國有熱客終身無此趣窮日
冰霜中泥深乏健步童僕饑欲啼瘦馬行復顧高嶺怯
隆從陰澗凜寒汴村烟正寥遠羣鳥噪獨樹

戊子春初余將有京國之行先至都梁勾稽吏事
傳柑燈夜集飲山亭佳客紛來而亮書未與座上
上意興缺如也今乃贈我新詩恤我勞役命詞

都雅用情深長不有和章烏徵同調爰布四韻
為言寸心

儒冠已悞尚峩峩問訊年華各易過

亮書與余同庚戌生

別後故人

憐愈遠見時白髮較前多扁舟鮭菜留淮海貢粟滌洄
達潞河歸日丰神應好在不知詩格老如何

愧我還家未錦衣喜君常得覲庭闈

亮書官闈常得省覲

月當春好

君方往鴈到秋來我亦歸雪水泠泠浸細草寒山淡淡
接斜暉淮干握手勞相送看爾翩翩舉世稀

夜雨早行口占

驅馬南來得快晴江雲亂起落簷聲遙知白髮挑燈坐
應念青衫冒雨行

戊子除夕

在鳳署以
陞銜管事

暖入軒屏散縷烟他鄉雲物感華年
草生燒岸痕留恨
梅老闌窻夢可憐
客裏情懷春較好
花時池館燕爭還
時余候
代將歸殘宵深惜頻移歲
頭白青燈綠酒邊

過東平

軺車曾此載恩波
五載年華一擲梭
米價市頭聞倍減
酒帘路左較前多
麥翻碧浪田皆闢
菜綻黃花春正和
惟有飄零紅粉怨
天荒地老未消磨

改官後別金陵之作

七載留都悞一官
頭銜雖改二毛攢
青鞋難遍前朝寺
玉筍曾邀南國歡
江上好山別汝去
樓中明月贈誰看

岸邊可有歌聲在
千尺秦淮水亘寒

己丑元旦自述

康熙歲己丑龍飛閱四紀
余生恰四十年前
方從仕糜俸已八載
每懷素餐恥奔走
緇塵中何暇究治理
冒昧荷遷官私心未敢喜
國計與民生毫無所匡砥
太守亦顯名厚德鮮諸已
巖巖臨吏民內顧何所恃
總角聞庭訓作吏事可已
守令不易為多不稱任
使慎刑如慎疾救患如救燬
既被利害怵復為嗜好累
真知而方行今固難言矣
乃余三昆季前後皆官此
緬想二十年父言猶在耳
君親恩至重淵冰傲臨履
茲逢歲正朔萬事重端始
願言自今往鞭策惰惰起
千古聖賢心所求常在

裏進脩及壯年白日無停晷

元夜短歌簡友人

雲淺月溶溶烟深燈煜煜七見濠州春風景近相熟市
井之燈火巷陌無絲竹氣盡黑山賊百年未興復丞署
更荒落破壁黃茅屋久居已鬱鬱肆顧轉踽踽我昨行
殺歸春光又觸目元夜但兀坐空堂如空谷豈無酒一
盞不破愁千斛中夜短歌成欲書筆久禿東齋結襪生
伊吾仍愛讀

懷古四律

鳳陽邊
官日作

西望寒原烟雨凝斷碑殘礎卧荒塍銅駝有恨思殷鑒
石馬無聲泣漢陵春薦不來空鶴表冬青久盡黯魚燈

白頭落魄何人拜骨襯寒沙坏土崩

仁祖

琳宮紺殿識焚餘細草斜陽感故墟往事塔鈴常夜語

新原寺衲自深耒二龍早戰興基日一鉢先傳遜國初

明初即有胡藍大
獄迄以黨禍亡國

客過山阿求舊跡枯松亂石一僧廬

龍興寺

招攜風雨縱樓觀鐘鼓消沈憂百端漁棹隔雲橫野浦
炊烟背日出茅團蕭條市井侯門古寥落山河戰壘殘
獨少銅臺歌妓在西陵朝夕哭聲寒鼓樓

城頭遠眺碧烟消城下離離彼稷苗設險徒聞雄百雉
覆隍競說用羣貂斷垣自放牛羊入墮甕仍隨野火燒
不盡白頭烏惹恨女墻月色更無聊

鳳陽城

淮揚舟次雜興

春雨霏微日孤帆獨去時
隋堤新濯柳女廟古靈旗
湖海行將老煙波渺未期
江皋聞素鶴好爵欲誰縻
溪橋來社燕澤國又春風
夢遠千山北輕寒一棹東
月明漁笛裏天盡暮烟中
淮市王孫去空餘芳草叢
新漲浸沙草閒雲戀遠岑
鄉思華髮亂往事玉樓沈
堤繞湖千頃村深樹幾林
滄洲知浩渺吾欲託遐心
廿四橋邊路汀洲接綠蕪
平山青帶郭隋苑曉啼烏
俗舊工歌舞賢仍隱釣屠
東巡頻被幸載入屬車無

瓜洲江口卽事

一塔江中出羣峰天外圍
澄波平似掌蕪岸綠為衣
樹簇芳洲近烟鋪漁棹稀
潮隨帆影落雲逐雁聲飛
北固

山常好南州客未歸
浪淘千古盡鷗夢半春違

遊金山江天寺觀

御書碑

康熙丁卯南巡時立碑
御書江天一覽四字

入寺躋雲表登峯縱海觀
濤聲驚日浴山勢鬱龍盤
地險浮城郭天花墮塔端
烟霞增氣象風雨助高寒
一片碧琉璃影干堆白雪
湍齊梁雄百戰鐘鼓送雙丸
濯垢中濡水行經老衲壇
塵心來自寂春事去仍殘
玉殿留空翠靈巖護寶翰
宸恩遍一覽萬國頌安瀾

三岔河

有行宮在
勅賜高旻寺側

細雨連宵綠野芹離宮寥寂鎖閒雲
客舟揚子橋邊泊僧梵高旻寺外聞
寒食節來晴日少潤州路入亂山紛
汀洲夢斷藤蘿月猶記宸遊奉聖君

燕子磯

翠蘚丹崖映碧流，孤亭飛閣俯晴洲。
人家茅屋雲根裏，賈客風帆天盡頭。
時有烟嵐遮舞影，常隨欵乃語春愁。
剪花掠水空江古，烏巷何年憶往遊。

歐梅

傳係廬陵文忠公手植，餘人以歐梅稱之。

吹徹春風怨未醒，人間笛不到幽亭。
醉鄉噩夢逃千劫，靜境枯叢護百靈。
艷着山腰泉過洗，香空葉底月來聽。
鳩聲易惹枝頭雨，有客酸心子又青。

花魂託命養花天，花似文章藉命傳。
高士山中甘久臥，酒徒祠畔得長年。
垂垂一樹催朝夕，兀兀三朝閱播遷。

梅歷宋元明三代

翁去梅心應日醉，樓中燕子也相憐。

懷署小亭望荆塗，二山簡舊令沈翁菴。

兩峯如二老相對，揖青霄紅日冒其巔。
白雲束其腰，一亭大如拳。山靈日拱朝，經旬失面目。
烟霧湧層潮，嶙峋不可見。風雨正飄搖，晚來俯欹檻。
竹樹空蕭蕭，同遊非舊侶。飄散疾烟颺，追溯禹鑿年。
去日何從招太璞，久彫琢寶氣。近寥寥，爲謝泣玉生。
揮盃向巖嶠。

賦得無可奈何花落去

萼騰已過困人天，老大看花異往年。
最是蒼苔獨立處，消魂無語晚風前。

啼殘山鳥日徐移，照影空潭綠滿池。
半晌憑欄看不足，直應想到未開時。

暗潮侵曉到溪頭舊繞山家老屋流一夜飛紅到牆外
三春漂泊任汀洲
不應白髮戀青春色寂香空認幻身有眼只宜明我相
世無薄福看花人

喜崔子允公同舟遠送賦此誌別

仲連歸路共蘭橈華髮英風欲射潮我愛閒吟囊每溢
君多盛氣腹仍枵春園載酒游如夢故國浮雲首正翹
別後齋前松各種龍鱗成日好相招

題畫

黃昏淡月滿空山家在疎梧密竹間僻徑自無俗客過
幽人侵夜抱琴還

和馬馬卿苦雨原韻

累月同君戴漏天連朝晴日散林烟馬周作客貧非病
杜甫還鄉喜欲癡館隔荒城分旅夢歌殘楊柳悵歸鞭
輕囊各動長鬚哂猶遣泥塗錦字傳

積雨米貴作歌簡吳南英解元

騷人問天作天問無乃高高聽卑近一雨十旬尚密雲
豈其粒食天意靳前有所致後有兆乘除往復理無紊
未應洪水見堯年始疑洪範未足訓不言米價叔真癡
陳蔡之間賢者愠小民焉能盡夷惠攘臂攫食固其分
古云有天在口腹此天不弔民始忿更有一天寄民岩
視聽以之關世運

懷海言集卷四
姑蘇顧氏幼聘陳女未嫁夫亡守貞不字歸節於
顧父母哀之女曰世間道理只有一條路可謂
知明處當矣

只有一條路鮮能中道立康衢與曲逕所爭在呼吸其
直雖如矢捷足追弗及旁途多岐邪幽谷引之入我冠
博帶人跬步必拱揖瞠目投棘叢觸藩方愧悵蘇門有
弱女閨外步常戢出門由斯路向道自汲汲從善信如
登進步匪階級一蹴上層雲高山仰岌岌下視蹒跚輩
徒為途窮泣此路心自明此路行獨習彤管紀周行後
塵堪追挹

刈麥謠

日出村原東照我麥葉黃葉黃子終青離離委南岡刈
作爨下薪匪言積乃倉豪家聞刈麥下馬蹲我場租吏
聞刈麥跂股據我床南原十畝計不厭一壺觴公私兩
莫補咨嗟仰屋梁無麥古斲重餓人滿翳桑

拾麥謠

刈麥已失望拾麥復何心餓糧既未裹稂穗將奚尋饑
驅扃戶出不暇計久深溝壑無遠近豈必委故林日午
筐篚空僵卧路樹陰婦子牽衣號啼久聲轉沈南風吹
哭聲何由入虞琴

大梁渡河有憶

長堤曲抱野風多北望夷門未忍過博浪塵沙終黯淡

梁園詞賦古蹉跎閒情逐水回南浦疎雨隨人渡大河
前路車聲驚客耳石城絲管夢方訛

渡漳河將至舍簡同行依菴上人

銅臺霜瓦蕩輕沙官柳晴絲散曉鴉北向雲山分趙魏
東歸流水共年華息交又結逃禪侶混跡終隣鬻餅家
除掃荒園淘舊井豆棚晚坐有茶瓜

過崇光寺簡依菴上人

師以磨鏡名其語錄

偶攜惠遠啓蕭關佛座禪床灑墨斑獨渾機鋒存本色
更從文字寫春山籠中日月磨明鏡筆底烟霞駐渥顏
我亦闌珊疎世法午鐘消受片時閒

憶白下

畫樓委宛接江洲山色湖光古未收紅袖笙歌沈歲月
綠楊簾幙惹風流高城雲隔長干寺曲檻花藏桃葉舟
招我臥遊思往夢秦淮桂影到今留

七夕花燭

金屋鴛衾展銀河鵲駕填吹簫集鳳羽解佩擁龍輶佳
偶仙緣合機絲赤線牽天人良會永此夕是何年

上少宰李山公世丈

七十懸車髮尚緇獨留清望答明時俊才南國傳三畏
雅操當朝凜四知常見中台騰紫氣每逢大事憶黃耆
塵踪更切龍門望藥裹應無草木遺
公典試江南以君子有三畏命題
慇懃情話念師門用拙相傳道尚存冰玉持心無厚積

李桃成逕少私恩著書松下馴雛鶴貫酒山家注瓦盆
莫問堯年幾甲子太平學士腹常捫

古簫行

一枝紫玉前朝物流落人間歲月疾夜深清響起秋齋
四壁涼風盡瑟瑟當年戎馬生四郊散失霓裳與六么
宮人無復白頭在別有朱唇倚碧簫蘇臺絡繹徵歌舞
醉後寧王喜羯鼓吳歛夢斷隔清江何期燕市聞金縷
重來烏帽染京塵扇底樽前失故人琵琶小字存鸚鵡
珍重紅兒一曲新歌前聚散芳年改青鬢朱顏不及待
江淮留滯又十春桃花零落劉郎在吹殘良夜轉淒清
座上青衫最愴情誰為嬴女吹簫侶好作秦樓引鳳聲

瘦馬歌戲呈贊旃家舅

半束芻一盂豆舊骨鋒稜愈削瘦日向天街踏軟塵顧
影羞隨肥馬後馬上先生常苦饑出入秘書在懷袖東
華門外曉風多漠漠沙飛面蒙垢錦韉零落敝裘寒
逡巡爾似忘馳驟日厭歸來旋乞米策勲無物及棧廩空
為我馬賦虺隤金臺枉說千金購

己丑臘日余生四十年矣改補閩郡候命都門諸
戚友釀筵見祝賦此答謝

湖海長年愧側身遊踪四十尚逡巡每當生日違親舍
更值移官抗吏塵輦下新聲翻舊譜樽前情話共陳人
今宵紙帳留寒月早夢梅花嶺外春

已丑除夕 在京寓作

殘年風軟雪初晴梅老經寒自向榮萬國曆頒天子朔
六街鼓報太平聲 京師婦女能過太平鼓 舊歡如歲拋除夜客况隨
春轉上京莫怨燕雲隔鄉縣八千里外更孤征

久客都下艱於乞米常啜麥餅菜羹作以自嘲 廬用

陵贈梅聖俞韻

一枝落莫寄淮西再向金臺跡久羈黃塵黯黯吹面黑
東華曉暮交輪蹄香車寶馬常塞路五陵佳氣凌雲霓
道逢前驅遭叱叱疲驢無地容長嘶經旬堅臥畏一出
短衾縮脚夢迷離夜響窓櫺撲春雪忽積街頭盈尺泥
宮燭侯鯖兩寂寞朱門欲叩無階梯且破封塵開舊卷

晴室倏照雙文屏更值春光回窮谷東風送暖到卑栖

自酌瓦樽供軟飽 俗以醉為軟飽 隣墻鼎鼎又啼雞長安久居良

不易 人嘲樂天云長安米貴居大不易 朝廚玉視太倉穉僮父克腸厭秬稻

自炊薄餅水玻璃 近以西洋新製水玻璃為貴 雜進藿羹間豆粥鄉味豈

因旅食暝曉起呼童過隣圃葱針菜甲擷春畦老饕豈

不嗜魚肉垂涎入市愁排擠寧杜板扉束枵腹膏粱不

願輕招攜更思糜祿非長策早辦躬耕雨一犁

庚寅元夜偕眾連宵出遊都市歸寓漫成

帝里陽和轉塞寒通宵車馬競遊觀市頭紅藥先春放

京師元宵即有售芍藥花於市者 塵裏花燈照夜闌歌吹偏宜牆外聽繁華

不耐客中看獨留一片關山月慰我孤帷好夢殘

上僉憲屠公

江漢台星迫朝陽曉日曛嘉謀協一德丰采動羣公隴
右絃歌滿淮南騷裏空龍文雙闕近鵬運五雲翀帝賚
推鳴鳳民天慰澤鴻參苓歸廣幕吐握見高風共覩旌
賢詔專資養聖功重熙清望屬九陛積誠通夾輔安周
召聯情洽府宮何須焚諫草耿耿照宸楓

宋楊誠齋有眼到天南最盡頭之句余出守閩漳

感而成詩三首留別輦下羣公

眼到天南最盡頭孤征潘鬢感先秋夢中何處無雙闕
海外居然有九州瘴雨蠻烟新入句書籤藥裏舊從遊
長安棋局看難厭應向炎方玩蜃樓

眼到天南最盡頭嶺雲橫隔故山秋三湘夢遠峯迴雁
百越名輕海泛鷗洗耳且供官長罵治裝頻累老親愁
還餘春色隨征馬萬里鶯花遣興幽

時仲兄領
湖南郡

眼到天南最盡頭此行合是典貂裘炎風吹雨晴常少
海氣蒸人熱久留吳越江山灘北望幽并霜雪髮中求
七千里外鴻魚杳接得家書歲又週

送友人胡希山駱遇安南歸時有村優侑觴

荒城送客草淒淒南浦驚心遠樹低明月今宵鄉夢少
春風前路柳烟迷落花飛絮人千里曲岸長亭鶯亂啼
此去驪歌休疊奏離筵魂斷有烏栖

暮春南村觀社感舊

青原垂髮記從遊紅雨清樽點綠疇陶令園亭皆蔓草

先祖別墅平津賓客久荒丘 二十年前遊靈旗入廟風常滿

社鼓催春麥又秋十載黃塵吹髮短還家江總愧烏頭

題美人以落花砌成情字被風吹去

欄前堦下拾殘春容易芳心墮軟塵不分三生偏在我

無端一字最撩人青蘋起處魂應斷紅雨飛時跡已陳

獨有閒愁吹未去斜陽背立泣香茵

馬陵道口占

戰壘千秋沙草平更無戈戟碍春耕荒城夜半喧雷雨

好認當年萬弩聲

書見

連日舟中以溫李詩示兒輩因戲為西崑體非艷語也

洄溯清流五兩柔綺疎深碧見星眸鳳來乍喜羸簫咽

雲去空驚楚夢悠蓮渚一泓開鏡影梅粧半面鎖簾鈎

蕭郎不識橫塘路未許停船問莫愁

聞歌興感卽席漫成

雲英重見記依稀莫唱開元事總非吳苑歌殘暑雨歇

梁園客散賞心違浮名應謝白駒影過夢還驚蒼狗衣

扇底秦青憐好在花時春燕久高飛

姑蘇懷古 四首

秦伯城荒樹早秋令威宅廢井空留梅尋鄧尉山南路

泉品真娘墓上頭雪浪高人曾臥聽花洲少婦競春遊

獨憐白紵吳趨好楚婉齊娥俱莫謳

寒山寺遠夜鐘疎潮長淞江吊子胥齊女墳頭烟翠積
吳王宮址劫灰餘鴻飛史闕金閭字

梁鴻墓在金閭亭即今閭門也史載宋營陽王事無

亭名鶴舞人傳越絕書雨後湖光轉浩蕩三高祠下獨躋

躋少伯何因祠吳

館娃宮鎖翠微寒響屨無聲到講壇走狗洲長春草淺

採香涇僻野雲寬州犁有後能脩怨鄭旦無名巧避彈

自昔英雄論成敗誰忘得喪竟齊觀

魚腸一奮足為雄何用三千入秘宮金虎早招秦輦至

錦帆竟與越溪通生公石古歌常滿短簿祠荒月可中

日暮維舟登塔望海天無際晚霞紅

清湖放生崖登眺

片帆西湖越江分崖枕清溪迥未羣跨澗危樓石欲墮
含風老樹雨常聞舟維萬里灘頭客眼亂千重嶺上雲
華髮烟波仍浩蕩東南留滯愧明君

懷舫詩集卷之五

仙霞嶺

千峯萬峯煉石積扶輿何年宣奇秘地坼東南大力撐

天遣巨靈伸一臂初起三山特秀拔苔蘚不受風雨刷

旋如搢笏上朝天入嶺回頭望愁殺江郎三石入嶺南來回望却成一片從此

樞衣扶杖去細路千盤迂折處流泉夾道斷續鳴好為

俗客消塵慮郵亭遠近接僧家佛火常烹嶺後茶碧竹

蒼松寒白日丹巖翠嶂落閒花歸雲夙霧屯峽口峽中

不辨風虎吼捫蘿跨木橋晴霞更欲登天揭星斗嶺半石碣上勒

登天然三字 峯頂削成勢突兀箭筈通天開瑤闕 聖朝一統

達梯航青山半壁分閩越嶺半乃浙閩交界俯瞰懸崖支恠石猛

獸奇鬼驚旅魄禍亂削平三十年至今陰壑夜燐碧循
峯南下愈幽杳兒孫羅列羣山小紅葉嶺前起一峯仙
關雲外標華表霞嶺之南有楓嶺再南惟五顯嶺最高三楹古殿柏森森五丈
靈旗風浩浩廟前再過定何年客顏那似山容好憑高
連日倦偃僂嶮巖經來魂乍收陂轉岡平得坦道烟霞
回首正悠悠籃輿日午住浦城煮笋燒松慰友生身為
萬里南中吏不敢逢人話不平

嶺路口占四律

山聳千重翠溪流百道清深林透佛火斷澗隔鐘聲露
草迴風細晴雲貼屐輕蠶叢在世路此嶺覺寬平
竹色侵崖古松濤亂澗泉路迴千曲水亭枕一溪烟峯

際瞻香海峽中隱洞天客情何怨訴欲倩鳥聲傳
細磴穿雲直高泉引竹深艱虞思坦道潦倒倦名心疊
嶂青天瑣荒林午日沈烟霞孤癖在策杖事幽尋
蒼壁雄關闢紅塵貢荔鮮時平思帝力宦遠憶親年
北望三卷石南通一握天舉頭雲漢近去國莫潜然嶺上

有御書匾額

長竿行

長竿長竿削如刀篙師持此狎怒濤指揮撥亂反之正
濟物出險不言勞操舟放灘嘆逝水日下江河無所底
建瓶千里挽奔流灘頭橫插亂石壘亂石嵯岬浪如雪
一竿縱橫力似鐵恠底風雷日夕殷等閒攪動蛟龍穴

艤舟策勲酌師酒其濟君靈吾何有中林自昔稱野人
公侯干城皆赴赴

灘河舟行

處險不足憂出險不足喜君子果其行上下復有水雙
槳順流落兩岸挿雲起奔濤注峻灘駭疾不可視灘深
伏鼉鼉灘淺露虎兕灘頭雷車過灘下龍漦止輕舟駕
怒浪盤桓亂石裏旋轉類迴風傾注如舍矢我心堅匪
石撼彼中流砥在豫戒終日客行未遑已誰能賦四牡
吾為一拊髀

夜雨曉成

抵漳後患瘡初愈

秋雨淋零入夜深涼飈孤榻漏沈沈古來嶺外多遷客

此夕床頭非越吟萬里蕭條無塞雁一枝輾轉託幽禽
獨憐臥病同長孺衙鼓朝喧尚擁衾

龍江村舍

望塵僕僕已連朝暫憩山家夢鹿蕉疎竹挿籬侵野色
秋花杜戶隔煩囂年華陸海供彈指雞黍田翁慰折腰
溪口暮霞休盡斂客來好認武陵桃

暮行雲霄驛

斷嶺侵嵐濕流泉印月清青圍山縣小紫映海霞平何
處殘鐘起誰家墓道耕孤烟留古戍聖代久銷兵

過不孝嶺口占

家鄉計路八千多七十慈親髮半皤不孝嶺高仍遠去

未知遊子意如何

分水關

閩省南界去漳三百里與粵東潮陽接壤以關為限

剝水殘雲接短陴關分閩粵關雄奇山川畫界聯荒徼
市井當年燬亂離重嶺疊過家愈遠炎天垂盡路仍岐
道旁童叟勞迎迓對語斜陽兩未知

詔令高君怡藜賦長篇紀其風土余依韻成和而
意旨少別所謂詩以言志也

長橋橫野渡曲路繞城闔虎豹當關隘魚龍雜海濱潮
來如有約風起似無垠邑少歌絃士村多佩犢民伏戎
興近郭按劍在周親室或憂懸罄功誰策徙薪炎州天
不閉東服日為賓鮭莖屬常積寒暄歲未勻殊方需藥

餌薄俗願陶甄雲散留林影霜輕結草茵秋生一夜雨
花綻四時春島嶼烽烟息公侯甲第新建牙曾躍馬鳴
鏑忽拖紳水旱豐年乏梯航貢使煩一官羞皂蓋萬里
戀丹宸禹稷羣謀國鶴鷄自託身羊腸煩跋履馱舌費
咨詢柑荔香常摘豉鹽味漸馴北山移暫緩終肯負垂
綸

陰雨早渡雲霄驛河

夜渡蠻溪炬火明連山寒雨更宵征城頭霧重清笳咽
嶺脚泥深倦馬鳴百戰殘黎餘悍俗十年拙宦負勞生
孤烟發處何朝寺欲試名香叩定僧

重九簡齋友

南州瑟瑟見涼風不為炎方阻歲功菊放秋懷三徑遠
桐垂清響一階空紅塵白髮交頭上丹荔黃柑戀海東
眼底鄉思空曆亂登高分與故人同

梅村有天涯歌舞惜流年白即席賦呈座客

天涯歌舞惜流年對酒張燈歲又殘扇底秦青憐翠袖
鄉關庾信老鯢鱗詩成官閣梅花下魂斷新聲瘴海邊
最是月明回首處舊遊一夢隔山川

同安嶺路中早行偶成

輕雲漠漠草芊芊柴骨消磨老一肩空對山川幸快賞
難從道路檢華年嶺梅似雪飄林外海月如霜侵水邊
宣武門西寒夜半記曾沈醉紫簫前

去年此
時在都

宿船廠

透灑陂塘接遠蕪豪吟滄海壯懷辜悠悠魚笛隨泉咽
淡淡荒烟和月鋪自貢越裳來翡翠久標銅柱竄鼉鼉
灣腰樹枕空江老沾灑樓船血未枯

灣腰樹地
名舊戰場

庚寅除夕漳南郡署

南溟萬里遠分符日對文身陋魯儒海國春風來浩蕩
郡庭花氣入屠蘇雞聲又逐華年改鄉思還同寒漏徂
一首詩成更一歲浮生博得幾操觚

辛卯初春舟泊海昌微雨

澤國春風上布帆稽天放眼遠峯嵌空濛蜃海雲堪凭
飄渺神山翠可剗池在南溟思釣艇田依西廓悞征衫

雨敲船背寒侵夜記約誅茅大茂巖

太行一峯大茂巖恒山郡西南

元夜瀨溪舟次

是夜陰晦

契濶山溪月飄零海甸春石橋沽酒肆沙岸看燈人翠羽簪蠻女漁歌侑水神殊方有樂土羨爾葛天民

三山道上有懷清漳詹莪士

羣山闕處海光浮島嶼烟霞一縱眸憶自會盟通上國曾聞疆理命西周魯儒久絀章縫用漢使還虛束帛求愧我檀車徒况瘁每懷高士老南州

烏龍江

福州南五十里

遊踪歲老久孤迢又向南荒訊汐潮細雨村邊春水軟橫山峽外海風驕巫占雞骨從蠻俗野集鴻鳴感聖

朝欲就江干隱津吏長年對客說滔滔

卽席贈子敬家兄

良夜恰當歌春風海甸多華燈照驛館好月上藤蘿昆季天涯聚鄉關夢境訛莫辭旨酒醉歸路湛恩波

紙鳶

扶搖鎮日尚留斯結想浮雲一線羈手內徒然工反覆塵中無自辨雄雌粉榆時作違千里林苑昏栖少一枝若到九霄逢白鳳羽毛乞得好來儀

登道山謁忠貞公祠

用公集中武彞曲原韻

於戲元臣盡瘁兮帝悼哀明禋肇祀兮道山開高峯峻極兮流泉萬古正氣凌霄兮碧燐成甌青史幾行標亮

節赤城三載畫寒灰

公集中囑序公書有持蘆畫沙竟成塗壁之句

昔年瘴霧塞清晨

蛇豕當塗肆毒頻蚩尤躑躅折天柱至今五色燦卿雲

一朝嶺海喧鞞鼓三苗旋踵格干舞仗公抗志保東南

生民重慶堯天覩黃金鑄像玉栽林畫棟雕楹集翠禽

儼有英風吹殿壁靈旗浩浩展丹心三立如公真不死

百傳燕翼綿孫子朱輪畫戟滿侯門綏福自天保定爾

義自取兮仁獨當天為慘淡日昏黃

公遇難之日天日慘黯

列祖鑒

觀通帝載豈徒化蝶夢飛揚

公困阨時常夢在太宗世祖左右又有蝴蝶飛落公眉睫間

於戲

百拜公祠兮恍覩公面聞風興起兮頑懦利見睢陽身

殉兮子卿未歸常山舌厲兮侍中血濺天何意兮降岳

真竟使稷契夔皋兮夷齊成隣持蘆截炭兮輝煌棟宇

嘯歌怒罵兮流芬齒齟游魂淨盡兮天戈加威儀重見

兮父老譁人謂角生洪皓返誰知星殞武侯嗟

逆審公在後

道山祠前朝暮風河山如舊慰孤忠甘為鼎鑊全家燼

博得車書萬國同人生自顧誰無死不負所學端視此

平原當日不知名公久簡在聖天子聞公保釐如保嬰

當陞疾呼賦役輕每過湖山逢野老白頭垂涕頌名卿

公撫浙時大著惠政浙人至今不忘

古來忠孝經荼苦天挺象賢能繩武帝命

繼美振前徽不止明廷袞職補莊誦豐碑嘆復歔徘徊

階陞步次且千秋俎豆昭祠廟奕葉貂蟬擁賜書

御書旌忠碑文

以真本賜公家

振衣峯頭星斗揭鼉狸久灑平蕪血丹心化作海

天虹夜深還照長山雪萬里遼西賦招魂酌酒奠公公

耳熱武彝歌罷泣鬼神松聲泉韻相鳴咽嗚呼形在先
 文肅之門墻兮附於諸孫形父登順治三年丙戌進士文肅公為座主伏讀畫壁遺
 稿兮不禁襟袖沾灑於涕痕憶當時潮陽之應亂兮臣
 家亦有死事之郡守吁嗟乎天荒地老兮或追隨憲府
 之忠魂形叔祖名櫬祥康熙十五年守潮州死於劉進忠之難敢謂大義能共篤聊報師
 恩報國恩

和吸江樓八詠

延津城樓也署守張澹村倡題

劍潭倒影落層樓憶昔風帆迅未收奉使張騫多寄興
 思鄉王粲共探幽山川盡入登高賦暑雨難留下瀨舟
 誰復題詩和沈約願舒清嘯散林丘
 溪迴岸轉萬峯開潮擁孤城向暮回無計暫維遊子棹

那堪更上望鄉臺愁隨幾片蒼雲起眼碍千重遠樹栽
 深恠樓前千尺水忍拋客淚却南來

翠微耽坐碧窓虛肯讓驚人句不如滿泛多情河朔酒
 半生得意灞橋驢邀來明月擎盃問賦就新詩掃壁書
 絕少飛塵汗扇影使君心共白雲舒

簷角荒烟接古城空濠潮入碧痕生露粘竹嶼幽禽集
 鐘透松關野鶴迎風雨飄搖孤客夢寒暄旦暮世人情
 溪雲變態看何極老大徒慚事不更

蒼茫海外九州寬百尺憑虛一瞬看斜繞銀河來潑沆
 遙連玉宇得高寒還家自愧梁江總作吏人傳晉建安
 目送殊方春又去盃中有物且追歡

翰君飽看嶺南山老我玄文羨抱關避世安辭千日醉
當春却送幾人還滔滔陸海深仍屬僕僕曦輪古未閒
聞說九峰丹竈在願遺大藥駐朱顏九峰山在延平府治正南有仙人爐洞仍存
百越巖疆關武皇南遊歲序感炎涼有梅開去隨殘菊
無雁飛來叫早霜萬里紅塵時入貢三冬紫電夜浮光
風流更得逢迎處張緒才名滿樂浪

曹騰春盡夢無他雲罨烟籠子舍過花裏青鞵常載酒
燈前白雪偶當歌獨憐留滯南遷客共嘆年華東逝波
鈴閣早扃揮吏散醉來山簡咲顏酡

西郊 榕城

雨過山環蒼玉屏出郊人向畫中行水田漠漠秧針細

溪岼參參柳線輕花蕩青帘招客醉村闌黃犢想躬耕
裹糧欲訪雲深處筇杖芒屨老此生

洪山驛亭送客

近郭羣山曉翠浮方塘隨意有閒鷗苑邊已嘆磷磷塚
江上還憐泛泛舟誰肯當春常載酒我因送客一澆愁
憑欄莫寄思鄉淚灘水曾無向北流

自述近事

夢藝京華近絕聞南中風物漸能分半兼寒暖仍春候
忽起峯巒是夏雲墟客筇輿攢綠樹蠻粧榴髻映朱裙
殊音異服看來慣難對長安冠蓋羣

返漳郡再渡烏龍江

又向江津買渡船故鄉極北却南還來時梅蘂香初放
歸路榴花艷欲然鐘鼎勲名渾夢夢風塵行役竟年年
家山記得逢初夏茂樹移床日醉眠

瀨溪道次

嶺路榕陰合溪田野水平橋橫江口渡日上海邊城俗
失文身古官仍棄屣輕寫愁殊未盡人道有詩名

歸署途次漫興

石麓松高簇僧龕竹細圍山樵緣木上野鶩雜雲飛耳
熟侏離語風淒絺綌衣畫梁棲燕語歸與舊期違

過墓

頭銜滿碑版今古被名愚緩死無丹藥勞生悵白駒漆

燈照兔窟野燒鼠山龜遠鶴何年返應為世網驅

返漳口號

久客方知天有涯東南行盡見丹霞二公子愧五湖長

語出桓元 萬里人看四季花瘴雨過時山黯淡鷓鴣啼處樹

槎枒獨憐童僕他鄉慣却指漳城說到家

洛陽橋

玉龍蜿蜒接滄茫閱盡塵踪曉暮忙浩蕩西來憑砥柱

婆娑東望碍扶桑寰中碑版傳神物碑文能鎮火災祠內笙歌走

辦香橋號萬安家萬里倚欄若個不思鄉

漳平道上作

山雨淙淙急溪河汨汨流烟籠村舍遠雲壓亂峰稠虎

過長林靜虹垂曲澗幽上方何處寺扶杖晚鐘投

宿靖邑吳氏園亭主人未遇

池亭雨歇散蒼烟郭外晴山望蔚然高樹有蟬吟客夢
野花無主對誰妍重來看竹尋題句仍約沽樽破杖錢
莫更白雲深處去黃塵烏帽愧留連

夜泊高磔溪

十年雙眼黯緇塵澤國扁舟拙宦人海月照船將半夜
燕雲隔夢已前春水邊萍葉風何定笛裏梅花鬢總銀
獨恠烟波終浩渺蠻溪屢渡尚迷津

辛卯夏五澄令韓君邀同范六司馬會飲海宴樓

太平既久年豐時和寮案讌集雅歌誌喜

扶桑宵半海光浮城郭風烟接渚洲徐福僊山多歲月
漢家銅柱久懷柔九天雨露瞻皇極萬里蛟龍護貢舟
巷舞衢歌歡未厭好邀冠蓋醉樓頭
筵上霓裳海上城歌殘檻外暗潮生江州白傅琵琶語
花縣菁莪絃誦聲四牡王臣天保定八荒禹甸賦均平
仲宣當日風塵際應惜登高擅賦名

秋日藩伯邀請

督撫兩憲驗帑射飲恭紀十韻

夔龍尊夾輔禮樂肅班寮碧海無黃屋彤弓出絳霄持
籌知國裕藏富喜民饒樽俎塵氛靖歌絃雅化昭已看
調玉燭莫厭醉金貂揖讓羣觀德威儀峻建標高峯迎
旭日神技射寒潮心醉惟醇酒詩陳盡美謠三台輝鸞

鷺一郡託鷦鷯星聚應孚卜躔光接斗杓

尚書嶺路過秋闈歸士

高嶺遠迂盤千峰翠可餐尚書何代老行路古來難石
磴侵雲滑幽花帶雨寒青衫白首客強半悞儒冠
重陽憶兩先兄

白髮穆穆對鏡生離魂黯黯入秋驚清晨遠岫浮嵐色
靜夜幽窓落葉聲萬里飄零嶺外吏滿城風雨客中情
登高愁見茱萸插望絕霜天雁影橫

漳南九日虎磴登高得吟字賦呈雅集諸公

摳衣高巘入雲深舒嘯幽巖動遠音萬樹風松傳古韻
兩開霜菊寄鄉心煙霞舊侶能招隱秔稻新原愧作霖

自笑緇塵常障面經年攜酒一登臨

杯啣斜照坐松陰句刻蒼苔拂石岑變態浮雲爭放眼
長風陸海獨開襟馬鄒詞賦無人敵燕趙雲山有夢尋
但咏新詩魂已斷不須絲竹帶商音

是日無音樂

漠漠天垂塞雁沈茫茫秋盡海雲深風霜初識枕榔樹
搖落時為梁甫吟虎帶月歸僧有伴客題詩去竹無心
倦飛久羨將雛鳥終日栖遲在茂林

是日攜敏兒兩兒從遊

杖履東山歲月沈那堪白首一追尋當時令節登高會
此日殊方遊子心往事說來愁座客閒情鍾處託雲林
弟昆賓從知誰在三十年華異古今

隨先相國乙丑年登高賓主十人惟彤一人在耳

虎磴登高歌贈友人

松喬喬石磽磽南荒九月風蕭蕭兩年疾走四萬里歸
時妻子腹仍枵十載身依大梁住賣漿屠狗今寥寥久
無車魚不彈鋏羞見五侯七貴驕佳辰賓從出南郭筍
輿高舁上層霄下視塵飛平野濶朱纓紫馬氣騰囂髀
肉久生豪未減郎當雙袖晚風飄九萬奮騰嗟老大憑
欄四顧晴光搖更有古狂貪杯學清愁何物酒能澆狂
呼痛飲蠶叢路乘高履險足陵翹林杪夕陽下暮嶺拚
人同醉語嘵嘵斗酒安足辭百篇安足題虬髯如雪望
滄海悲歌慷慨低雲霓

辛卯生日

流光黯黯嘆嬰塵瘴海飄零值誕辰官閣梅花今燦爛
天涯雁序久沈淪望雲夢逼青山舊對酒燈搖白髮新
拂鏡莫嗟身老大醉顏留得少年春

立春後一日小憩僧舍壁有長公憶西湖詩

何來清夢到團蒲歲晚衙齋一事無郭外寒山殘臘盡
街頭小雨早春初禪關雲掩鐘常度深院梅開鳥自呼
留得新詩僧壁上應同鶴影印西湖

辛卯除夕

寒雨瀟瀟竹影斜風燈閃閃在天涯郡齋已過兩除夜
殘臘還開百種花家遠妻常坐米桶學荒子任改銀車
半生塵夢何堪憶但有新詩紀歲華

懷舫詩集卷之六

鏡中花

素壁開奩水一泓高堂照影越盈盈欄杆月到光堪摘
簾幙風來態自生常倩冰壺濯艷魄偶搔華髮對紅英
還餘老大雙青眼霧裏看花覺更明

壽遇安駱友

三春嶺海慰飄零花鳥常供醉眼青歌管夜闌雲尚駐
書聲曉徹鶴仍聽半生學道甘藏器萬里加年喜治經

時值五
十初度

莫訝城頭霞盡赤官齋知有少微星

夏日漳南山行

石路迂長覆火雲沙塵汗雨帶殘曛嶺頭柴爇天高徹

留底星搖水細分自宦炎州依夏日漸工蠻語稱參軍
山村夜宿兼三畏瘴霧蚊雷虎結羣

過泉州晚宿洛陽

城頭蒼翠罨斜陽路逐清渠傍女牆幾曲溪田通灌溉
誰家墓道散牛羊山光泉韻無時盡赤日黃塵底事忙
薄晚長橋徙倚處海潮浩浩月荒荒

常思嶺

嶺頭客過動長思心緒仍逢搖落時颯颯疎林多木下
蕭蕭蒼昊有霜吹關山迢遞親年老歲月飄零歸計遲
望裏浮雲還萬疊此情那遣雁鴻知

遊鼓山途次口占

淡雲疎雨已清秋偶訪招提象外遊深羨好山新入眼
不堪塵市更回頭勞肩久擬僧龕憩殘暑先從上界收
誰闢烟嵐傳客到長林幽鳥語如郵

路繞漁村野水通蹊田細颭稻花風長吟獨往秋山裏
逸興先飛城郭東半嶺江流浮漭沆上方日影散空濛
投筇且倚石亭望可有南來一塞鴻

秋夜

軒開纖月入簾展夜涼侵露井梧陰密風簾燭影深吟
餘常隱几吏散一鳴琴庭樹何蕭瑟悠然萬里心
山翠秋經染鴉群晚自還竹荒初足雨月淡未消煙湖
海已垂老淹留復判年故人黃菊裏誰寄採芝篇

河挂山樓外螢飛宵露中新苔上石檻夙霧占花叢酒
半澆書蠹吟多託草蟲曉霞看斂盡秋思遍丹楓

壬辰九日虎磴邀魯觀察登高

幽懷塵外豁山迥得秋深時序殊方景蕭騷拙宦心披
雲迴石磴載酒入霜林何處鐘聲起悠悠度遠岑
古寺虛廊迥蒼屏一飽看短衣粘冷翠薄醉醒哀湍清
管雲中急黃花海上海上寒登臨思少壯誰爲繫雙丸
豸角霜新肅蛟宮霧夙收石泉留勝跡丘壑有嘉猷高
宴千峰擁豪吟百感投軒車歸路裏冉冉暮雲稠
烟水浩無際石梁近夕城津亭垂柳黯漁火照船明野
月隨人返秋山帶郭橫客魂淒斷處知有暗潮聲

雨夜

寒雨迎潮夜清樽度嶺人雲侵菊影濕露湛桂香新客
夢秋頻醒頽顏酒暫春那堪書幌外浙瀝響霜筠
幽禽常喚月蕙草自零風笛起隣樓迥愁深此夜中星
搖雙劍老壁閃一燈紅已悞行吟久仍然伴候蟲

自述

海隰秋垂盡明時祿久叨那能無俗物直是有驚濤事
悟泥中爪廉爭井上螭惟當揮吏去容我一持螯
譙鼓知催老庭花解笑忙乘軒不會戰東帶竟能狂漉
酒欹紗帽攤書滿印床新詩真長物應爲累歸裝

冬日曉行小營嶺

寒山霧重失峻嶒誰捧霞端海日升嶺脚梅開疑是雪
澗邊鐘動忽逢僧霜風客路憐驅馬紅藥家山憶杖簾
潦倒炎州腸久熱故人那寄玉壺冰

贈俞閏選卦師

世上雙眸盡炯炯力辭康衢落陷穽君今白眼望青天
目中難着俗人影郎當破袖露靈龜響應直如鐘扣槌
曹騰長夜忽逢君暗室倏然星日炳久羞曲學罵公孫
講易談元皆骨鯁饑時抱膝漫成歌聲出金石四壁靜
妻莫謫子莫啼我有二老魂無棲但得一杯子心盡墓
頭何必侈封題可憐劉季空天子昭陵無骨委沙泥窮
老炎方大事遂何妨眉睫起雲翳盲者其目神朗朗世
事端賴發醢雞莊生迂性說齊物豈知物性本不齊君
不見世間明察秋毫客却問先生路指迷

題周觀察像

策蹇隨驢奴
攜梅一枝

君昔馳驅萬里流沙道衣馬翩躚正年少君今海外歸
來尚黑頭遊踪遠與伏波較平生有眼小扶輿忽來海
岸騎青驢炎歊何處覓冰雪一枝瘦影夢蘧蘧美人乎
高士乎隨予去問酒家胡男兒名姓已題御屏側何妨
軒冕走泥塗他日事了拂衣來海上應於十洲三島置
此圖

再過烏龍江

帆懸野岸橫江濶日射羣峯隱翠深來去頻招舟子笑

風濤時繫老親心

新接家書言老母注念海濱險遠

貧無長物詩還在病帶

餘醒藥易尋

時病猶未大愈

賴有春光迎倦客已為點綴遍梅林

長至後歸途自嘲

密樹藏山館孤亭帶夕陽橘垂霜葉赤草綴野雲黃歲
晚蓬仍轉葭吹日又長獨憐留滯客頭白在南荒
路久逡逡走魂徐黯黯招有魚垂直釣無米折空腰我
欲師齊贅誰能殺鄭僑敢懷鴻鵠志暫許託鷓鴣

興化城南多古墓感題華表上

碑橫墓道殘雲夕草接荒原野燒枯白骨何年封馬鬣
青山有恨悞羊奴空餘過客憑輿嘆忽聽寒鴉坐樹呼
千古興衰曾一瞬多時佳氣五陵無

東嶺山行遇同安朱明府時以養親請去感而成

詩

風裏寒山晚雲中冷翠昏幾株紅葉樹一簇白茅村倦
馬嘶長嶺殘陽下戍墩相逢彭澤宰清嘯憶蘇門

萬松關

霜月臨關迥松風度嶺長雲來連鷺島潮落見漁莊漢
使高銅柱堯仁被越裳誰知設險外別有壯金湯

重憩山家

殘歲仍塵馬荒村又午雞亂峯浮海上細路繞林西野
老訂前約茆齋識舊題素餐真自愧寧敢怨卑棲

壬辰除日郊迎撫軍口占

炎州次第賞花頻，開到梅殘歲又新。
冷淡雲山存臘意，蕭疎松竹似陳人。
行行出郭當除日，僕僕經年祇望塵。
早辦知非今夕好，不應久待七番春。

余去伯玉知非之年尚早七載

癸巳新正見月

萬緣過眼幻非真，香海浮生着點塵。
蓬島難求仙去藥，風濤易老宦遊身。
青山亂寫歸時趣，白髮重逢嶺外春。
今夜梅窻新月到，古來惟爾跡無陳。

梨花白燕

冷節花飛較雪多，烏衣舊影已全訛。
尚書樓裏粧應淡，弟子園中髮久皤。
掠盡寒香投夢好，啣殘玉樹送春過。
素心人遠誰同賞，風急雲深奈爾何。

賦得出郭溪山好

胡友惟度集字五律首句也余愛而和之

出郭溪山好，新原烟柳低。
羣峯連海濶，春水拍篙齊。
雪捲潮初落，雲平麥正棲。
人家連遠浦，又在夕陽西。

出郭溪山好，村樓烟靄中。
開窻新爽入，繞逕暗潮通。
疊嶂深含翠，孤帆晚趁風。
漁梁維纜處，恰與畫圖同。

春分同諸友福河夜遊

萬里南來海之角，客魂久逐危灘落。
跼蹐官齋倏四春，案上簿書日束縛。
車音馬影望天際，出門一與如籠鵲。
今年春到好風景，新水滿溪通城郭。
邀賓載酒上漁船，胸中有物忽如拓。
羣山拱揖翠重重，海氣空濛天漠漠。
村舍雲連新綠深，客帆背日晚風弱。
舟中賓從意俱適。

各營韻事雜雅謔或垂直釣握綸竿或爲泥飲羅杯杓
或歌吳趨笛孃孃或激秦聲孟格格主人倚檻久拈鬚
新詩自唱無酬酢潮來風急浪白頭晚峰殘照霞青絡
鐘動林昏鴉亂飛火明岸遠船爭泊我獨撥棹入滄茫
揮杯海窟冰蟾促東方月出大如盤霧瑣烟霾玉在璞
洞簫吹徹夜如年瀟漫天水何寥廓洗我盞更君酌嘆
息古人那可作江山轉瞬不復識後之視今應如昨他
年回憶此夕遊略同赤壁少一鶴

馬坪道中

新水秋分冷節前酒家花落野塘邊鷓鴣啼處溪雲起
楊柳歌時山雨綿慣識吟鞭惟老馬忽醒塵夢有寒泉

隴頭驅犢何由得負盡躬耕一笠烟

雨中漫興

一春花信雨中沈粉褪香零別怨深飛絮有情縈夢蝶
落紅無賴惜鳴禽爐爇衾潤寒初減枕亂簷聲夜不禁
獨喜郊原新水足山農簞笠滿中林

四月初八日壽遇安駱友

諱曇
除人

四月八日君誕世西方之人指天地君生中華學鄒魯
名偶同兮行則異耽詩嗜酒備頑福子慧妻賢乏俗事
北闕風雲更扶搖南荒花月聊遊戲三年海上富奇文
萬卷胸中核精義立身不愧聖人徒何妨仙其品而佛
其諱

楊柳風

河橋翠浪拂新曠雲影烟絲唱渭城
第舍幾株搖酒幔
畫樓一匝送鶯聲
離魂曲裏誰招得
舞袖歌前倩染成
最是斜陽池水畔
長條委地不勝情

梧桐月

新苔滿砌襯輕陰
花徑清宵滴翠深
金井露凝蟬悄悄
玉鈎雲淡夜沈沈
枝頭團扇搖千葉
欄外匡牀置一琴
吹笛已驚孤客夢
還憐繞樹未栖禽

芭蕉雨

綠窻幽怨入秋多
翠袖啼痕夢易訛
孤枕淒其如漏滴
空階斷續與蛩和
聲敲院落隨寒杵
響到池塘亂敗荷

獨惜舊題淋洗盡
芳心欲展柰愁何

梅花雪

幾堆香玉捲簾春
此事平章讓野人
嫩蘂凍含偏綽約
老枝歷損倍精神
調高一曲花都發
夢到三城鬢似銀
可喜山翁成獨往
溪邊林外好垂綸

數月間鬚髮蒼然酌酒自慰

酌酒澆鬚髮應貽明鏡羞青絲
行改色紅燭漫追遊
江總還家晚安仁
入鬢秋那禁常送客
無奈偶登樓
親舍雲遮眼
梁園雪滿頭
梨花晴壓帽
霜月夜垂鈎
顧影人將老
彈冠夢好收
千年遼鶴頂
可有二三毛
稠村舍見梁燕
哺雛有感

社燕巢梁護衆雛飛啣如織口呱呱短簷斜掠茆粘翅
敗箔低穿日炙膚何事舐兒師老特可能反哺類慈鳥
方塘是處烟波足似爾勞勞愧野鳧

水潮口登舟晚行憶京師

悠然雙槳劃滄溟浦遠烟深露欲零拍岸小波層湧月
隨灣茂草亂粘螢漁歸火照潮初落山晚鐘疎寺未扃
神武門前赤日裏有誰相憶到沙汀

籠雀爲兒童所飼日久放去不飛招之復至感此

有作

小鳥榆陰惜翠衣朱樊忽自踏危機無多飲啄何堪戀
若許雲天不肯飛有客開籠憐戢羽憑誰援手慰調饑

相呼悞說依人好矧繳如蓬趁早歸

六月晦日雨中述懷

好雨催殘暑飄蕭入夜聞秋聲在竹樹民事慰霓雲農
圃懷初愜涼暄歲又分客心淒惻處一誦北山文
吏散空庭寂襟披烈暑消無才吟蟋蟀有興寫芭蕉物
候驚秋早炎歊去國遙海雲棲樹杪鎮日聽蕭蕭
草色籠烟淺蛙聲傍晚多盆蘭披細葉檻竹挺脩柯搖
落關情緒滄茫想笠蓑涼颺到枕簟歸路夢常訛
契濶憐妻子凋零哭弟毘一身留海外萬里望君門化
俗心何補圖歸腹自捫忍教垂白母扶病撫曾孫
入湧泉寺和櫟園先生韻

滾滾塵嬰快賞稀
新秋蠟屐扣雲扉
江明斷岫兼天湧
花落空巖挾雨飛
到寺即大雨
山色年年投客夢
鐘聲夜夜到漁磯
應邀泉石留軒冕
何事遊蹤久未歸
山有石歸石
佛閣橫霞作斷文
秋光澹宕已三分
孤幢影照松間月
清梵風飄海上雲
鈴語自消涼夜永
禪關不掩旅思紛
芒屨竹笠何年事
願領經聲證所聞

秋日新室偶成賦以誌懷用少陵寒雨朝行視園

樹韻

碧梧紫竹擁高株
秋色侵簾得入無
小院疎砧敲雨歇
新涼深坐趁懷舒
綠雲風颭農村遍
清露蟲鳴物候殊
棋子聲和桐葉落
芰荷香迸酒腸枯
窺窓纖月烟常織
移床石檻紅筩撥
行藥花籬翠袖扶
秉燭題詩原漫興
浮生強半惜東隅

中秋歌宴竟夜燈明月皎賦以誌盛

歌繞花臺迥燈懸碧宇
寒垂簷雲似殼隱樹月如盤
歲序他鄉感琴樽此夜歡
空庭橫細藻纖指瀉幽灘
衣露蟾光墮天香桂影蟠
槎聞浮海上河恍挂樓端
高座偕康樂清芬襲蕙蘭
虛名詩是累塵跡祿仍千秋判
涼飈早時平厚澤寬蕭疎容傲吏
落拓側賢冠萬里懷昂激層霄戢羽翰
扁舟搖皓魄渾欲老漁竿

獨酌

華髮先秋歲月催青山負約且啣盃一燈靜對人如夢
萬事澄觀心欲灰盛業終同浮海霧虛名空付過雲雷
醉鄉娛老真長策千日沉酣恨早回

漳南十景

圓嶠來青

高城深隱霧冥冥閒挹山光到訟庭隔斷晴嵐塵自遠
撲來冷翠醉還醒迢遙入夢沈鈴閣荏苒隨雲過野汀
獨訝憑欄新雨後誰為點染佛頭青

西浦明霞

飄零遠浦照殘霞漠漠烟低護淺沙風起亂沈溪水急
林疎半罨夕陽斜幾層斷處聯孤鷺千片飛時逐暮鴉

悞盡野樵歸路渺何人嶺上種桃花

鶴嶺晴烟

石磴楓林咽細泉山雲亂墮壓輿肩人家樓閣松篁簇
古廟門垣橘柚懸白鶴數聲留曉月碧天無際足浮烟
嶺腰悽絕南征客一上高峯一竚延

虎渡春潮

渡口多年虎跡滿雄風駭浪怒龍驕長虹靜影垂沈綠
萬派喧鳴注沃焦村路魚鹽通蜃市蹊田斥鹵種蝗苗
岸邊故壘荒殘久烽火云曾照汐潮

甘露神亭

扶筇獨往俯郊坰百仞嶙峋滿郡青浩蕩風烟來紫極

萬千氣象接滄溟高山流水琴傳語明月吹笙鶴墮翎
立久野棠花落盡何心載酒過雲亭

南山秋色

溪橋霜曉水如藍帶郭諸峯影靜函幾簇荒林懸夕照
多年廢塔隱深嵐涼風白袷秋思切紅葉黃花野興耽
欲約虎磴僧共老芒屨從此遍天南

龍江夜雨

荒江一卧老羈踪岸貼長雲入夜濃柔櫓不鳴眠野鷺
暗潮無語送寒鐘聲淒船背蕭蕭響愁重燈前黯黯容
莫倚篷窗彈短劍恐隨風雨化蛟龍

松關暮雪

侯王化盡剩崇墉古戍荒烟靖遠烽客過寒林常颯颯
雲連野島自重重梅村風月飛殘雪墓道牛羊踏亂松
嶺半遷人南去路歸來誰似舊時容

丹霞曉日

天盡東隅夜早闌紅雲滄海接迴瀾神鰲背上撐三足
若木枝頭上半竿萬戶晴光來冉冉羣峰宿霧散漫漫
駐顏何處求仙藥留得傾陽一寸丹

寶峰飛翠

空庭吏散落花稀羨爾城頭注翠微暮嶺峻嶒垂日脚
蒼屏鬩黷綴雲衣崗巒顧祖兒孫擁溪水朝宗風氣歸
常倚危樓招秀色會隨靈鷲忽高飛

懷舫詩集卷之七

同趙思皇舟行宿瀨溪

平橋曲岸晚烟稠
百折清溪送小舟
往事語君渾似夢
春風吹水碧於油
半竿落日雲層起
一簇孤村山四週
此夜猿啼徹處
可憐心緒共悠悠

所憶

多時無夢遣離魂
旅夜挑燈盡一樽
來往楓林關塞路
月明何處不黃昏
畢然落拓似無情
且向春風冷處行
年少如卿應惜別
老來聚散識浮生

春日再過洛陽

沙泥浩浩石磷磷
滄海曾聞起細塵
一去難回橋下水
頻來易老客中身
青生燒岸春經眼
花近粧樓燕惱人
陌上天桃開復謝
憑誰沽酒奠香茵

有寄

驅馳萬里炎州客
潦倒鄉思日正長
此際風花誰管領
昔年鞍馬幾門牆
雲留雁柱歌遲發
珠落檀槽酒倍香
記取南亭重握手
應憐負盡好時光

作吏

作吏十餘年
傾囊少俸錢
市頭淹酒債
館壁綴詩篇
夢憇黃茅下
花飛碧巘邊
一肩吾欲老
轉覺負華顛

署中仰文樓成

用香山韻

郡建弘圖遠樓觀
舊制卑儘堪望雲物
不為貯妻兒高曠心
常逸虛明政日施
築基如積篲伐木憶存皮
北闕恩無極南柯夢一枝
鄉思容伏枕春眺省褰帷
不謂民來急應妨歸賦
遲後賢歌宴好或念落成時

自述

宦拙時甘謝顏頰
鏡欲嫌有心皆是妄
無用却宜潛釋鬱常開卷
除塵日下簾客稀樽自強
兒嬾課徐添祇許為雌伏
誰堪似蚓廉菜根吾分嚼
功業願難厭

夏五漳署引優侑神值小恙感述

五夏炎威觸淹留偶熱中

余自寅夏蒞漳已五度夏常苦熱

縈懷皆物役嗜

古竟誰雄病覺鄉思切
愁緣道力空虛窻欹枕
處聊自

咏涼風

憶昔隨村叟郊原薦麥新
幽風本王業溪水隔秦民
婦子嗟難慰兒童髮早銀
孤踪歌吹裡渾忘客南閩

先嚴忌日偶成

憶別音容三十年君親難報愧
遑然課兒不為書中粟
糜祿常惺心上天蕭颯墳原生
宿草荒涼子舍隔蒼烟
頭髮瘴海成何事早辦抽簪種墓田

雨後同龍溪江大尹遊憇南寺深賞余蒙城除夕

詩回憶已十年矣賦此答之

南原霽色散林臯荒寺松風湧翠濤
碧沼栽蓮諸品淨黃塵揮汗一肩勞
雨餘蔀屋憂初釋心遠招提禪欲逃

愧詠十年前舊句蕭疎蒼髮不堪搔

送孟朴菴之任滇南

論交投分盡清流送客張筵值早秋
千里故人重握手雙旌遠浦正凝眸
碧雞祠下荒殘夢鐵鎖河邊憶往遊
愧我鱸尊思日切望君魚雁到滄洲

枯坐四首

枯坐殘燈動旅思百年將半竟何為
宦情祇對秋蟲說歸計先輸塞鴈知
蕪盡田園難養母傳來書澤愧將兒
寒城戍鼓聲悲壯正是詩成自咏時

倦眼頻驚奕局新嘗來甘苦語何人
郎當舞自招時哂瀟洒情難溷吏塵
共指談諧非世法誰憐詞賦類先民

忘機本爲生才拙藏拙容吾祇率真

子舍橫雲漫五年紅樓計日屢期愆菜根獨嚼知官味

飯顆相逢動友憐窺鏡依人惟白髮檢囊長物剩青氈

清宵且盡杯中酒今古浮生信偶然

途遇故人
訝余顛顛

老大疎慵悔厲侵慨慷不減少時心文傳有命名山在

無窮滄海深從古交情盟白水近來交道惜黃金

書劍飄零慣何必隨行定鶴琴

午秋遊瑞竹巖

秋水繞城秋雨歇日揖羣峰言契濶山靈黯黯似招遊
霧髻烟鬟晨夕列一舟雙槳趁寒潮雁宕魚汀歷百折
石梁繫纜遇山僧幽境聽傳屢咋舌勞生有癖痼烟霞

塵緣多障疎巖穴沿溪跨澗上松關萬樹風濤一時發
危磴盤迴拂亂雲清泉滴瀝融殘雪正訝峻嶒運鬼工
忽鑿渾沌開幽窟恠石飛墮欲壓人仰視魂搖指暗齧
轉穿一竇透旭陽箭筈通天非險絕帽簷疑挂海霞來
肩頭嫌碍飛鳥越上方隱隱動鼓鐘古塔森森懸硨磲
登峰輕勿欵禪扉且望滄海觀溟渤晴光浩蕩水天杳
蓬瀛何處堪乘筏老衲啓關延客入古洞陰沉瘞佛骨
下有流泉引籜龍香厨活水烹薇蕨更上層巒得虛廠
罡風吹袖涼如鐵一聲孤磬落深潭千年龍睡如蟲蟄
再尋奇秘懸崖底谷口石床苔蘚潔但聞花草盡丹香
那得飛仙見出沒塵跡到此已忘年更欲攀躋筋力劣

苦茗一杯香一爐壁句徐讀悵殘缺買得名山知付誰
翰墨有緣隨處結倦眸五見嶺海秋白汗赤輪空歲月
蒲團趺坐片時閒山腰斜日僧旋別俯矚平原起暮烟
又復攢眉歸城闕

遊雲洞

清秋逸興足瘦馬忽鞍鞚崗巒數起伏選勝躋雲洞長
橋跨巖外澗壑注瀑凍蕭颯萬木森常聞風雨動寺門
迎緇衣錫杖前賢頌山有朱文公祠及題壁大小字蒼崖問奇字芳規愧接
踵荒祠迥千仞雲霞滿梁棟獨隨野鶴上時有啼猿共
盤側望洞口幽黯如懸甕神禹不能鑿煉石留罅縫客
心震嶮巖僧錐勞引控磋砑花葉垂蠶叢虎豹縱片月

映寒潭惟明生虛空轉行盡窅奧漸出開霧霧高閣聳
層霄放眼快賓從嘯歌消萬慮逢迎得二仲揮絃應天
籟凡響悉禽哢窻間題短句峻壁待磨礱日昃不可留
嵐翠粘衣重連夕憶昨遊恍然隔仙夢

水口借宿小樓偶感

零收殘夢傍荒江雲嶺烟波總異鄉漁火照船霜似練
夜猿啼月鐵為腸偶來着榻詩懸壁早起開窻山滿房
聽徹灘聲愁不減擬從此地東歸裝

洪山橋舟行

山高不受野雲吞浦遠還留淺漲痕沙嘴浮烟疑是水
嶺腰抱樹却成村輕風送客帆無恙賈舶懸燈岬已昏

黃葉覆堤人跡亂未知沽飲扣誰門

近困關有白雲寺洞愚公上人開建時已西歸矣

乘暇偕興化泉州兩同寅往遊學使張涵六繼

至叙此記之

困關百家村競說白雲寺往來危灘間古刹無人至客
心爲形役鬱鬱少佳致聞有名山近欣然復好事凌晨
成獨往傳簡約同志籃輿到參差入境皆稱異緣溪一
徑折跨澗六橋值喬松蔭沉綠修篁搖淺翠潺潺細泉
鳴颯颯涼風吹幽亭橫梁建徙倚息勞動亂石夾路立
刻題詳人地老僧三十年仗錫自位置能以歡喜緣廣
結行住類去者月印影來者香觸鼻上坐自談經頑石

點頭侍春初聞勝遊山林冠蓋萃一偈綴名篇莫喻西
歸意問訊僧已寂相顧發深喟影堂瞻定顏方瞳如注
視一塵揮世塵山靈忽崩墜遂飲上池水更飽齋廚糲
提攜尋舊路慷慨浮生寄聽泉峰腰間盤桓不忍棄又
報憲節臨曠達脫俗累重遊興轉適川巖增嫵媚咏嘆
感今昔死生見高義禪關閉重啟茗椀滌再試半晌深
山中令人忘名利峰巔有幽洞白晝百恠備愚公曾結
茅夜枕諸魔睡欲攀籐葛上僧雛色先悸望之徒蔚然
烟霞少真嗜寺樓午鐘動逡巡別嶺次誰無買山願鮮
具大慧智廊廟忽江湖顏色成顛顛脚根無卓錫先須
學覆簣白雲兮白雲對之誰無愧

乙未年再過分水關有感

心跡顏唐寄海濱風光多少付流塵
新詩楊柳常懷別舊袖房櫳久怨春
先攏將飛寒食雨故園應有醉花人
粵關再過成何事已見空壕草綠頻

春日有事南詔四首

野水侵沙曉暮流斷橋殘岬接烟洲
宿雲密貼新生草舊雨輕消往日遊
刺眼風光雙海燕側身滄溟一浮鷗
湖頭越女凝眸久誰使春寒倚畫樓

春山看遍海東隅去日無停路轉迂
林際殘梅隨臘盡天涯倦馬逐塵驅
息肩樹下墟人集問渡沙頭津吏吁
十載客顏顛顛甚苦將烏帽壓銀鬚

輕舟划破碧溪烟烟滿前溪風滿船
一木支橋通野市幾家編竹繞流泉
水禽浴處人垂釣雲碓舂時客扣舷
何事莎邊喧浣女使君枕藉老漁眠

嶺石嵯峨古未平雲橫嶺半半陰晴
人愁四顧荒山色泉咽千林木葉聲
誰遣暗潮生曲澗空憐故壘插高旌
由來遷客南征路到此鴻毛視上卿

上元

酒闌燈黯月朦朧心緒誰憐薄醉中
花信東臯催夜雨客懷南畝憶春風
浮雲聚散無今古塞馬憂欣有曠聾
令節每逢空老大歡情那共少年同

夜行羅山嶺

月黯四山黑林深一炬明懸崖臨絕澗響落飛泉聲哀
猿挂樹號野狐學人行猛虎伏何處常凜腥風生五年
客荒遠簡書迫嚴程宵征歷欹側委命鴻毛輕瘴霧塞
瀰漫惡木紛縱橫海風颯然至萬竅爭長鳴驛亭在嶺
半二三老戍兵扣門不敢應恐客是山精慘澹憶兒時
親衰念焚焚毀傷豈固恤悞爲世塵嬰鷓啼何切切愧
茲烏鳥情

夢中

夢中無夜不還鄉開遍閒庭幾棗棠恰見母妻同笑語
忽逢父老話存亡園亭修爾來遊侶城郭依然帶夕陽
多少癡魂留滯處醒時身尚在南荒

海風

海風夜半來溪水盡躍起舟子推篷看天黑似釜底舉
火加繫纜水寒堪墮指隣船競呼嘆終宵但徙倚春雨
忽瀰漫客怨農夫喜津吏勞慰問津亭勸宿止予方扣
舷歌聲與金石比履險胡能安十載風波裏

舟回

舟回春雨正瀟瀟黯淡離魂久待招雙鬢花時傷老大
孤篷澤國怨漂搖浮踪世上惟萍水好夢床頭有鹿蕉
無際烟波歸去晚未廿肥遯負唐堯

勸農口吟

春雨幸粗足南荒麥早秋一輿扶兩隸朝出東門遊出

遊遍村落祇為婦子謀刈草莫滋蔓蔓長佳禾憂灌田
莫過水水遍美利周能存不盡心庶幾免悔尤循溪入
原隰適興止林丘兒童皆追逐雞犬亦閒幽三五父老
輩一二髦俊儔慙慙前致訓士農共蹇脩孝弟與勤儉
分外無所求東家具雞黍西圃起歌謳願結長吏權暫
爾偕油油去城尚十里日下山雲頭司閭舉火待桃源
不可留

脩戰船

名為二千石歲俸僅百緡時鑄較古法緡計千制錢六
載未頒領移脩水戰船水兵十萬人糜餉如流泉日晚
船樓醉日高船腹眠年年脩戰艦牢繫海岬邊烈日曝

船背細蟲噬船舷船未離海岬已為爨下烟去秋南風
盛賊艘什伍連今春商舶稀風濤戒心懸戰艦不涉水
戰兵不控弦累脩欲何為魚脫烏須筌徒損度支額更
重守吏愆一修鬚鬢白再脩膏血乾養子莫讀書從戎
莫憂貧願監脩戰艦安富尊榮全

擬白紵歌三首

白紵好詞歌白紵華筵寶炬歌式舞庭花亂墮鶯啼樹
簾草如烟烟千縷長袖裁成縑幾許婉轉君前心盡吐
客心成歡妾心苦舉腕揚袂復延佇高堂沉醉流年古
安得常看常媚嫵

殘陽滿壁花滿枝恰是儂唱紵詞時一聲初發管絃起

流盼四座聽者怡錦席試展明璫垂迴風為捲湘裙低
簷月照眉春漏遲管絃急催調暗移客前盡笑後盡悲
憂從中來誰得知

彈琴不如箜篌好彈之坐上朱顏老時有清颺下晴昊
拂雲入樹何窈窕白紵歌長歌未了客行駟馬雙旌渺
翠掩紅啼啼漸悄誰能復聽傷懷抱十五學歌成草草
不識離聲似悲鳥

步禱岱山寺宿壇祈雨得雨

朝出北城門遂陟北山崗萬衆夾路立十里如堵墻皂
幡畫雲物神龍勢騰張云能致雨澤託以慰愴惶古寺
依林麓花木接僧房築壇陂塘側遠近蹊田荒日晡烟

霧集野迥增暮涼乍喜得霖霖久望繼沱滂孤磬息羣
動惟燈照佛堂默坐聽雨聲世味如冰霜晨起聞踏歌
簔笠滿圃場一宵春水足秧馬縱橫長

祈雨宿岱山寺

宋時蘇長公祈雨斬鷲龍有蒼鷲無罪亦可憐之句余效其法祈雨鷲未斬而雨足

簷聲清脆夜聽宜恰是春殘待澤時漏永齋壇僧咒梵
枕橫靈雨客吟詩凌晨溪滿秧分插繞檻香寒花自垂
還放蒼鷲歸野沼綠波深處誦師慈

放鷲

送爾歸極樂得且住為佳寺池種白蓮開時見天花清
波會濯垢空香散無涯聞經生歡喜聽法解呬啞延頸
受接引獅象成一家

寺僧呪之延頸皈依

安得廣佛慈普濟恒河沙

偶拈二絕句

南風拂座日偏長時就桐陰檢藥方自古養心惟寡慾
好移孟氏配軒皇

世事無窮生有涯隨時開落感庭花何須赤日東華道
白髮盈頭滿面沙

春日齋宿岱山寺祈雨雨足放鷺中元日設醮禮
佛復值大雨到寺白鷺無恙喜而賦此

城郭輕雷宿霧中荒林無樹不雲蒙溪邊晚稼咸棲畝
寺裏秋花又滿叢閒聽疎鐘烟雨外偶尋殘夢佛堂東
白鷺穩泛山塘濶好歛萍踪認主翁

花有清香月有陰

檻曲移纖月雲舒映朶花凝香千瓣簇照影一林賒海
嶠霞偏擁風臺幔自遮盈盈饒露氣黯黯送年華紅樹
留光永冰輪趁艷斜夜遊良足慕行樂自無涯

赴海澄來往順風朝去暮返

殘陽欲下海風來吹送孤篷去復回獨喜馮夷頻有惠
却憐鷗鳥兩無猜漁舟鮭菜誇兼味澤國烟波遠上台
且向榕陰深處問誰家醉客甕新開

抵海澄贈令君韓

白雲貼岸水侵城城壓秋山晚翠生負郭幾家攢市井
戍臺比歲少旗旌地多斥鹵收藏薄人習風濤身命輕
喜得令君弘雅化絃歌滿縣一琴鳴

送希山胡先生歸吳門

六載南州甘苦同
津亭話別恰寒風
第昆秋雁惟存我
賓客晨星獨重公
歸路霜花鋪荻岬
家山春色透梅叢
吳江月落烏啼夜
應有離思繞夢中

聞薦擬行

我行日月邁親老
分歸休姓名上薦牘
重作京華遊寒風
自北來溪水日東流
隨陽愧塞雁適性謝汀鷗
驅馬晴原外流盼遍林丘
舊來炎暑路倏與冰雪儔
乃信年矢催寒暑如酢醺
途遙歲又厭懷抱知開否
到家添白髮轉博親心憂
悠悠風塵際遊子將焉求

盤倉口占

齋印去累日事緒仍拏紛
倉廩雖日積野有啼饑民
徒為監守累無救公私貧
乃知聚散理用財貴發身
春長舊粟盡枵腹耕清晨
秋晚新穀登不足償苦辛
蓋藏鮮善計徵歛恒多門
顧茲紅與朽奪彼飽和溫
社鼠何其逸村農何其勤
周饑愧無術爰望後來人

交印卜行

印去几案靜吏散庭除閒
天寒歲復晚勞勞事間關
驅馳壯夫志霜霰遊子顏
委婉清溪水風吹碧幾灣
黯淡長天雪雲來忽掩山
我行風雪時寧辭道路艱
家有垂白親計日望兒還
敝裘沾濕處慚愧萊衣斑

去漳赴都

川原望不極客思正紛紛稚女留炎郡慈親隔朔雲嬌
啼癡可念衰病遠難聞鬢雪添繁際愁從兩地分

馳馬

生長幽并間鞭轡日在把一輿度嶺來羣空不識馬忽
如出籠禽翹翹向曠野風日得晴暖襟懷倍瀟灑興來
思控鞍疾騁斜陽下撫髀傷遲暮顧影失都雅減盡舊
粗豪愧彼行路者

生日長福途次

我生臘日後為臨之初九四十六年間強半遂遂走糜
祿十五載為丞洎為守心神闇自憐形骸勞汝久貧丞
難養親遠守不攜家郡齋與道路同是在天涯村舍亦
物安用排曉衙

榕樹

溪邊老樹閱年深半壓津亭半水心葉受風吹常瑟瑟
影留月照倍沉沉高枝巢鶴千秋物老幹橫橋一畝陰
欲擬歲寒松柏隊可堪移植雪霜林

行路難

舊為燕趙悲歌士曾作濠梁冗長官偶到南荒充守吏
又膺上考入長安僕飢馬倦衣裘敝途遠風高霜雪寒
奏績朝京猶若此可知行路古來難

別離難

前路千重隔朔雲深堂悄坐遠思紛那能身作閒風月
晝逐清塵夜照君

自題四律

六載塵中甘混迹忽驚薦牘採虛名銅章封送歸朝興
翠袖啼淹賦別情裘馬滿京來計吏雪霜兩鬢厠狂生
燕南趙北風沙路又聽車鈴浪蕩鳴

籃輿舁上嶺高頭閩越山川久滯留瘴雨夜來榕樹黯

颼風朝霽島雲浮荔枝釀酒曾謀醉蠻女諧歌亦解憂

去郡莫言風土劣此身正恐負漳州

放翁詩有此身不負負嘉州之句

火雲來路方愁熱雨雪歸途又怯寒時令遷流忙裏過
人情涼煖靜中看欣聞姻串新登第忽訝知交近謫官

兩眼漸昏心更拙重觀奕局到長安

松柏歲寒誰早識春榮桃李不須言古來造命由君相
老至貽安念子孫幻夢黑甜何日醒浮雲結聚幾時存
明知竟未拂衣去尚有君親難報恩

見雁

塞雁聯飛急歸途動遠情嶺高難見影寒重恰聞聲共
嘆來南服相逢快北行輸君兄弟在客久賦孤征

黃田驛

梅花滿麓夾烟溪貼岸浮香入棹遲疎雨打船獨寐夜
孤燈照水二更時猿聲直教灘聲接閨夢頻通客夢知
惆悵蘆中羣宿雁北飛未肯漫相攜

見雪

廈門舊名
白鷺島

炎歊久與素心違
君忽南來我北歸
白鷺島邊思不得
黃茆瘴裏見應稀
今晨峻嶺斑斕積
昨夜危灘散漫飛
官閣梅花相憶切
寒香瘦影欲誰依

懷舫詩集卷之八

唐人李頻有故園歸去及新年之句感而有作

故園歸去及新年已見梅開嶺路邊
豪氣久消湖海興
寒山細咏冰濛天
霜花野逕星星色
日影村原漠漠烟
倦客塵心醒徹處
溪聲泉韻總悠然

故園歸去及新年
瑟奏齊門誰見憐
燕市屠沽非素侶
秦京顛顛有膠絃
買山囊溢妻寬請
招隱文成友愛傳
重到燕臺尋舊館
黃雲如幕草如烟

故園歸去及新年
庭院風光舊可憐
社燕頻來春寂悄
棠花屢謝草芊綿
到門童掃蓬蒿逕
拂鏡妻驚霜雪顛
莫向樓中惜去日
堪嗟子舍有蛸懸

故園歸去及新年歲月昔騰驚逝泉華屋隣家移僻巷
兒時同輩葬荒阡夕陽自下依城郭流水還來繞舍田
馬上西屏容飽看蔚然深秀似從前

吳門贈周自牧

繫纜吳江霜雪殘相逢鬚髮各驚看關中投筆歸何晚
嶺外趨朝春正寒客况久嘗時序迫宦情原淡酒盃寬
回思四十年來事萍聚蓬飄行路難

丙申上元泊瓜州江岍

霜篷雪鬢泊江沱獨咏其如良夜何深霧幾層遮鐵甕
長風萬里湧金波樂遊此地山川好令節誰家花月多
靜對漁燈邀薄醉寒光為我到藤蘿

城西

城西路輾石磷磷官柳垂絲蕩軟塵細馬輕車無佳日
斷垣荒塚不知春愁聞繡嶺宮前曲易老霓裳掌上身
何事桃花開落處生冠霜鬢往來頻

張日容太史招飲賦贈

已拚嶺海卧滄烟重踏京塵歲屢遷都觀桃花非舊雨
梨園白髮感新絃何期勞吏參高會况值清樽醉別筵
片月蕭涼無暑氣羣公豪邁半華顛黃金臺下客將發
鐵甕城邊秋正妍北固江山千古在好收佳麗入詩篇

贈陳滄洲

朐舟泊吳門頌聲溢兩岍云况青天後

况鍾明蘇州良刺史

公來日

復旦輦下幸邂逅為國識楨幹豁達露性情委蛇平患
難暫借補衮手校書寄東觀治理方勤求豈終托柔翰
慚幼讀父書學道廢途半見賢深仰止宦跡徒汗漫觀
公舊治績無能企涯畔願贈仁人言遵循得成筭

由家赴任南徐

河原驅馬去悠悠儘好家山未肯留甫脫羈雲歸海燕
又尋舊夢狎江鷗樹迴野渡開青嶂天拓孤懷入碧秋
驛路津亭如昔在祇移歲序是新愁

大柳驛牡丹

名花門外接勞塵開謝風前改歲頻徒有空香生古寺
祇餘卓馬閱殘春常羞上苑稱佳樹願托西方見美人

路左飛驂無住日誰曾攬轡一逡巡

虎阜

山靈綿古醉笙歌誰遣閒情賦薜蘿七里畫欄花夢穩
四時蒼砌酒痕多常憐趁月秋期迫曾記如雲輦路訛
繞指南音靡綬甚雄風劍氣久消磨

寒露夜舟行

向晚清溪冷江南已暮秋岫昏津鼓急市遠野雲悠佳
麗十年夢琴樽一葉舟孤吟霜夜半恐對五湖羞
飄泊烟波久蕭騷作使臣稻梁謀尚拙湖海宦長貧井
邑憐凋敝風謠愧采陳短篷燈火黯殘月淡如銀
由三汊河舟行赴儀真

邗江分水入真州霜蘸楓醺蕪岬勾萬乘經遊如昨日
片帆重到更深秋野雲半掩橋邊塔暮雨常扃寺外樓
高旻寺傍置行宮今將圯矣 試上長堤問舊柳寒烟織盡古今愁

儀真夜泊

津鼓遙傳林岬昏沙尖山月照潮痕開篷弄笛漁歌起
掩卷懷人燭淚繁霜堵淒淒聞旅雁寒星耿耿落深樽
祇言飄泊吾生慣老去鄉關念獨存

王培青同學至鎮

君來江上續詩盟沙鳥風帆盡有情放眼看山饒北岡
登高作賦類西征千秋故蹟留雲水一諾虛名愧友生
喜對新醅思舊雨可知自昔路難行

十月十五夜月

潤州秋後月已見兩迴新城郭留孤影江潮送滿輪來
驚棲定鳥移照夢回人今古虧圓處悲歡想未勻
斜傍東山小平臨江水清霜餘看倍潔客裏照偏明甘
作無情物愁登不夜城寒風蕭颯甚淒絕暮砧聲

月夜舟行

江濶一舟渺烟深兩岬昏漁梁燈映月村逕犬迎門隱
隱無聲櫓淒淒徹曉猿未知篷底客顛顛欲何言
城上宵鳴柝江頭夜啓關往迴津吏老浩蕩水雲寬才
盡詩仍咏親衰薙尚彈平生湖海興浮宅亦無難
丹陽岸傍僧舍題壁

寺臨秋水淨小院散殘陽茶熟常供客林疎早得霜
暄僧背暖入座鳥聲長門外迷津濶誰招普渡航

聞調任海疆有作

丹陽
舟次

斜日雲中脫輕烟草際浮長堤紛落木小艇亂寒流直
是漂搖慣還增老大愁荒江容我卧滄海共誰遊雉作
乘三嗅風行御八周巨鰲那可得仙藥渺難求歲月雙
蓬鬢功名一蜃樓水天終浩浩身世久悠悠塞馬無欣
戚汀鷗任去留親衰方待養祿薄且包羞

上制憲赫大人二十韻

湖海常為客風濤久置身蜃浮天外市瘴隔嶺頭春奕
世承先澤層霄愧後塵三年偕計吏萬里作歸人北闕

恩推舊南徐政覲新飄零獲奉母落拓幸依仁紫極夔
龍佐黃麻姚宋倫化行聲教盛膏沛楚吳均至性兼忠
孝純誠貫子臣謳歌遍里閭哀感動江濱乾溢連秋值
流離九陛陳積逋應盡豁比屋豈終貧疾苦開啣切痼
瘵繫念真鴻飛窮谷暖雉伏大田馴績著樓船御光生
榮戟隣仙舟招共涉芻議引全伸指掌分諸道虛中集
衆論建侯咨四岳謀國格三辰藥籠儲材備龍門屬望
頻向來羞驥足驅策敢逡巡

晉謁後再呈十韻

時尾舟入吳議調海縣復蒙公
詢及老母起居飲食感而再賦

雅量含章邃肫誠錫類頻休休能育物蹇蹇善成身昔
遠清言簡謨深冰鑑神樽彛三代古詞賦六朝新師友

衡前哲津梁啓後人當時資弼亮早歲掌絲綸吐握賢
關闢謙撝士氣伸鴛羣邀一顧樗圃際三春載去非張
翰移來愧寇恂應憐捧檄者色喜為慈親

簡蘇州太守梁敬仲

隨君郡試未成童斑鬢相看訝兩翁契濶常為十載別
音書近得一江通黃公治行知能媿白傅詩篇想愈工
愧我漂搖烟水裏無才何計慰原鴻時議賑饑
鄉園寥落故家稀蛛網仍懸草自菲書畫船空多散失
粗豪俗在少輕肥魏徵宅賣誰為贖江總頭髡尚未歸
越女湖邊相遇者惟君可問舊烏衣

遊花山

時仲冬短景至山已暮回憶
丁亥之春遊此忽十年矣

胥江篷外市塵飛便溯清溪上翠微迢遞寒山招客往
逶迤燒岬待春歸松關凍合僧來少竹院雲深鳥過稀
訝我此遊遲暮甚雪霜滿地與時違

求侶十年竟隔羣花峰前路艷如雲新粧炫服春遊共
冰澗寒林暮嶺分秉燭真教成痼疾下山已
燃炬矣聽泉已似落
聲聞歸來月滿烟溪岬賃酒誰家舊識君

贈梅定九先生

推遷誰信歲無差測驗方知天有涯康節著書兼理數
羲和承命本中華實徵器象昭千古獨渾機祥屏百家
自是聖門觀海士何須重譯訪流沙

贈楊大瓢

名噪諸侯四十年飄蕭鬚髮飽風烟一編自據鳳樓樹
九萬爭求鷺換箋林仲不成封禪草馮權得令孟嘗傳
聞君幾夕挑燈話知有龍光近在田

寒夜吳門選歌雅集

兩載蕭騷面墻立每嘆雅音近散失羣山輦玉砌瑤臺
歌場正苦誅求急腰身掌上畫圖傳絲管雲中聲調集
侯門是處有新聲江南翁姥思兒泣我來吳苑訪遺珠
邂逅樽前十之一賀老知名已有年秋娘神韻今無匹
霜湛歌喉雲不流燭搖舞影魂都軼四座凝觀靜悄然
有人暗拭青衫濕花月銷磨欲白頭去日漂搖追弗及
老來罕遇是歡場欲續此遊那可必

冬日雅集喜梅定九楊大瓢先渭求在座

談諧列座集高賢茗椀爐烟釀雪天賢路齊驅皆上駟
名山分貯各千年鍾峯秀色連眉宇南國寒香落酒邊
他日安車徵四皓愧余難附箇中傳

題先司馬槐川精舍圖

先叔高祖明世宗時任
三邊總制入為大司馬

城隅娛老構幽亭中夜誰期落大星客散花茵風自掃
鶴歸歌院月同聽幾篇諫草心頭血一片桑田海岸青
喬木凋零鳥足嘆貽安百代有傳經

贈劉荻江

劉為山陽許掌科賞
識者贈之詩十餘首

公幹騎驢來南國懷刺漫減投不得襍被蕭條復渡江
新詩滿篋無人識江南歲厭風雪稠旅館烟虛待朝食

未覺飢腸輾轉鳴豪吟猶有千鈞力淮左故人黃閣老
當寧披疏曾動色爲賦長歌慰客愁讀之塊壘填胸臆
奈淮兩岸雲如墨一夜雪深埋短筭誰憐越石舞雞心
掉破層雲生羽翼余早十年見二毛俗情略諳荒學殖
徒賞石才竟何爲喟然一嘆成攔筆

問年

問年及艾未知非回首風光已暮遲宦到無成方見拙
心多未信尚稽疑川陵自古悲遼鶴金紫由來悞廟犧
爲問東華塵際客青山獨往是何時

和先渭求贈詩韻

櫟園當盛時已傷海田變近日客金陵更無開雅譙十

載憶前聞姓名列鬣彥杳杳風塵間未暇造廬見初春
具醴酒四座聽雄辨中有釣渭翁淵泓含厚眷文章鄙
晁賈治術薄管晏愧及讀父書粗豪長畿甸祖澤存史
籍左馬長微擅先業昭前朝久總邦之憲小子承門闕
學未窺崖岸每對高潔士景行發深嘆何期流俗吏老
輩垂青盼未知百年中果成何豎建東南文獻留勿虛
就正願

京口雜占

寒雨迎潮泊檻低秋聲簷溜倍淒淒文章牛馬塵中走
事業虬蟬穴內栖何日閒雲方返岫眼前飛絮久成泥
少年意緒清宵盡埽上荒雞仍亂啼

江頭曉望有雲橫秋色偏多鐵甕城雪浪連天孤塔影
霜蘆隔岸塞鴻聲晴嵐窗裏峰峰好漁艇沙頭箇箇輕
擬向焦山最高處清晨坐到月輪明

戊戌春初官齋小集

時定九涓求
大瓢在座

人居晉宋間地紀齊梁後座客聯青氈一翁獨黃耆結
襪重王生開筵禮枚叟道腴膏梁薄德潤文繡醜筮升
得初六卜遯安上九百代尚折衷萬卷咸披手釋疑刃
迎肯扣響杵落白觀聽如測海蓄殖似積阜接談亂霏
玉駐顏凝醴酒顧茲老成輩惓懷風雅首駑足隊騏驥
松華間蒲柳藉君鬪珍奇引我窺淵藪濯魄照冰壺飲
醇美脂口自陋宦遊人高托忘年友堯夫幾甲子蘭亭

數癸丑游覽匪可傳事跡亦速朽試問此讌集已占星
聚否

新齋成疊石為山賦紀

作宦少閒趣晨起罷俗營命移南山石磊磊列後庭能
添濠濮意頓遠軒冕情新齋廠四牖曉望烟嵐生盡日
披書對有時繞楹行蒼古無近態竹樹散幽聲石罅融
殘雪石根堆落英春水洗瘦骨寒梅發澹馨環顧千片
玉置身比瑤瓊從茲北固下奇峰多一名

戊戌春日再泊吳門

屢到吳江夜泊船江干風月負華顛家園迢遞三千里
踪跡漂搖二十年舊聽笙歌歸碧落昔遊亭館蕩荒烟

青山亦自隨時改嵐翠銷磨不似前

謂虎阜真面目大非舊觀矣

眼鏡

眼前懸鏡春冰薄昔曾暫試旋屏落雙眸兀兀黯無光
轉覺生翳更長膜近向江城攝法曹案頭日受簿書虐
挑燈細檢復重披字裏行間疑舛錯開筭取鏡方觸鼻
昏霧朦塵忽似拓乃知精彩與年華此漸增長彼暗削
世間寒暑能化物角膠折裂金石爍况具七尺有情身
得失纖毫關苦樂閱歷炎涼五十年眼前何事看如昨
掩卷移燈就枕眠此理暗中堪摸索

水木明瑟園訪殘梅贈主翁陸元公

鄧尉山中萬樹雪經旬留滯寒香減况逢雨促杏花時

原上春風逼冷節漫移短棹訪名園小波拍岸新燕潔
西屏嵐翠撲眉來詩脾挑動酒腸熱繫纜烟林未灑西
人家籬落綠溪結竹木披疎籬犬闌世間晉魏多年絕
便隨流水到荆關杖履紛迎盡才傑主人揖客過香叢
曲糸千層逕幾折石梁穩步入書堂樽壘有序坐無列
孤亭拂檻松風生南州芳躅宗先哲軒前草色月蕭涼
樓上竹聲雨淒切硯北村邊春日晡泝東橋外晴雲撒
臯原野望澹烟平歌舞吳城塵外截試茶酌酒整窩深
抽笋刈葵蒨岡凸高談雄辨惟林中間插幽禽百種舌
荷塘新漲綠於油蓉淑乾枝勁似鐵獨有殘梅幾樹花
垂垂簷際春全洩試問歡游載酒人若箇看花到耄耄

惆悵探梅已較遲，水面墻頭飛玉屑。千枝萬朶放香時，
妒煞仙人閉瑤闕。瀕行繾綣夕陽中，扣角為君歌一闕。
留贈山庭半壁詩，約醉花時滿園月。

題楊大瓢小照

大瓢先人故明義士，以事累遣卒於遼左。

誰從抱膝問襟期，別有閒愁壓兩眉。檢點名山傳往事，
對人聊寫望鄉詩。

傑士雅為今孝子，頑民疑是古忠臣。文章落筆關名義，
肯與齊梁作後塵。

龍戰當時血不分，燎原甘共石俱焚。蓋棺曾否收遺稿，
未見西臺慟哭文。

萬里關門歸骨難，故鄉雖在肯黃冠。知君遼左憂勞日，

不類蕭閒管幼安。

春分二首代

翠袖朱欄護淚紋，杏花原上又逢春。

春分江皋路繞芊芊草

山外林橫漠漠雲，奩隔鏡鸞常

黛感衾間寶鴨尚香薰

箇中消息憑鴛夢，莫遣黃鸝入

曉聞

每值花時夜雨多，湘簾油幕生

春過玳梁接羽雙元鳥

錦陌垂鞭幾玉珂，小院烟絲

吐壁月夕陽草葉點裙羅

懨懨儘教耽離緒，私祝華星

依漢河

答沈碣士

時館于署

茂苑風華慰夙期，清才雅操燭盡三條晚。遘時揮灑塵襟

真知希榻穿兩膝常稽古，歸嘯咏津梁吾道閱諸居。

生平蓄志非溫飽自覺行藏總合宜

落拓遙逢海徼秋文章庾信老供愁兒從失學年華邁

官愧常貧道路悠張祿綈袍多眷戀匡衡書籍偶淹留

他年結駟邯鄲北願掃蓬門話舊遊

白燕

為惜雕梁玉羽寒依栖板屋頗相安飛來不染新燕色

舞處寧忘素扇團梨苑啣春香自潔瑤臺照影雪多殘

招招宜入投懷夢尚覺清秋白袷寬

尚書樓鎖雪霜姿來值烏衣冷淡時砌壘是花皆玉屑

結巢有館定瑤池翅沾梅藥香無迹梁積芹泥涅不縈

蹴起天桃紛落瓣雙雙素壁點胭脂

崇川秋興

海表西風鄉路悠蓼花蘆葦小已清秋雲中闕影三年外

城上笳聲五夜頭甲盾登陴曾破敵順治己亥年事樓船運道舊

封侯元張朱二姓事書生來值消平但見空江曉暮流

島嶼風烟接混茫誰稽廷俱沙上崇氏紀荒唐雲飛水立蒼龍見

鶴舞鸞鳴仙駕張親見之蜃市曉開連颶母蛟宮夜

織採扶桑麻姑昨自城東過為報蓬瀛塵又揚

磯頭清淺住漁人蓬鬢麻衣太古民灘外風來沙似絮

門前月到浪如銀盤供鮭采嘗酣醉歲種蛭苗不計貧

明日浮家入烟水蓬萊何處問居隣

夕陽城郭枕清溪海氣空濛閱四時濕霧深屯樓閣小

寒潮暗繞堵墻低城內無高 始師温似絮裝裘足魚賤如泥
勸飯宜甘卧滄江狎野鳥無勞鳧雁更猜疑

遊太倉相國東園

太倉城東樂郊園幽閒舊是烟霞宅先公遺構二百年
世卿栽培當鼎革相國久承明廬容扣山扉納遊屐
老樹蒼藤皆法物樓顏壁字悉世澤淳龐朴茂見家風
屏盡繁華謝赫赫春曉臺前水一泓靜影涵空照天脊
婆娑古柳卧池陰似為芙蓉華改艷魄孤亭挺出霄烟上
危檻踈櫺跨積石振衣舒嘯引松風幽籟爭鳴海雲闌
畫就軒虛得景多烟烘月染無筆迹深堂行過板橋東
野藻披紛映几席雜花細竹繞籬根稻香更接晴雲陌

勝地鍾祥歸德門偶遊足慰嬰塵客猶記翠華南駐日
遍幸名園賜題額三逕苔深無輦路奉君心共秋陽白
襟期雅澹本前徽奕葉勲名照史冊

崑山舟次

婁江秋又判客適賦東征沙鳥隨雙槳山雲入滿城月
來清露悄風上布帆輕岸遠烟昏處逢逢津鼓鳴
襪被蕭涼日鄉關遲暮年丹楓收冷句白墮得愁眠菊
愛開霜後田宜耕社前故園生計在合奉板輿還

崑山紀遊

霜冷吳淞水倒影射孤塔一山滿縣青烟嵐城四匝繫
纜覓幽逕危磴蒼苔踏長林蔭綠深時有丹楓雜寺僻

遊踪希偏袒見野衲朝春夕負薪悠悠度伏臘樓臺互
罨映鐘鼓常鏜鞳飛檻海光浮返景虛窗納涼風歸路
晚秋聲淒颯颯明月玉峯巔蕭然照佛榻

逆風行


行役四閱月急於返署省觀北堂乃連日往返甫得事竣又值逆風感而歌之

西風颯颯吹行舟來者生歡去者愁客曉東來暮西去
憂欣遷變更何據天風廣被無容心順逆浮生隨所遇
柱下著書貴用無莊叟遺篇多言寓更須此中求準的
易戒憧憧省思慮千乘寧與簞豆殊不動厥心該巨細
昨為田舍翁今作尚書令門標畫戟獨蒙恩墓拱白楊
誰續命蟬冠蓆帽總邱土青絲白雪同明鏡斷自唐虞
四千年何處從頭說衰盛千秋名赫赫三爵酒陶陶百

子周文尚廢絕更有何人祀若敖塚壁搜書得贗本春
秋那盡識譏褒書必甚解真成癡古人難欺乃傑豪混
沌鑿破幾萬載何物到今非粕糟風惟無形斯化物有
形隨化無所逃吹噓寒煖在呼吸百年榮瘁適相遭嗚
呼悠悠百年榮瘁適相遭泰山吹擲等鴻毛

泊百花洲

清溪一曲恰通舟衰草荒林歷壑邱人哭人歌千雉古
吳興吳破百花愁鐘回漠漠城闈寺簾捲蕭蕭竹外樓
維棹幾時解纜去祇留殘夢在滄洲



慎言集卷之六

四

